

9-1-2024

## **PBAPP perlu siapkan penggantian injap dalam tempoh 24 Jam - Chow**



Ketua Menteri Pulau Pinang, Chow Kon Yeow (empat dari kanan) diiringi Ketua Pegawai Eksekutif Perbadanan Bekalan Air Pulau Pinang (PBAPP), K Pathmanathan (kanan) meninjau kerja-kerja penggantian dua unit injap kawalan 1.2 meter di Loji Rawatan Air (LRA) Sungai Dua di sini. FOTO DANIAL SAAD

Butterworth: Perbadanan Bekalan Air Pulau Pinang (PBAPP) diminta mengutamakan tiga perkara dalam senarai tugas berhubung gangguan bekalan air berjadual (SWSI) yang bermula esok.

Ketua Menteri Pulau Pinang, Chow Kon Yeow berkata PBAPP mesti menyiapkan penggantian dua injap kawalan 1,200 milimeter di Loji Rawatan Air (LRA) Sungai Dua, serta 22 projek penyelenggaraan pencegahan lain dalam tempoh 24 jam.

Menurutnya, ini bermakna menjelang 6 pagi pada Khamis, semua gangguan pulih seperti biasa.

"Melainkan jika berlaku kemalangan besar, kita mahu PBAPP berpegang kepada sasaran bekalan air empat peringkatnya sendiri seperti yang dihebahkan sebelum ini.

"PBAPP juga diminta menyiarkan sekurang-kurangnya tiga kemas kini setiap hari tentang kemajuan kerja dan proses pemulihan bekalan air.

"Mereka perlu mengeluarkan siaran media massa mengikut keperluan dan melaporkan isu serta cabaran.

"Jika akan berlaku kelewatan PBAPP harus mengumumkannya dengan segera," katanya pada sidang media selepas mengadakan lawatan ke LRA Sungai Dua, di sini, hari ini.

Chow berkata, beliau percaya PBAPP paling layak di Pulau Pinang untuk melaksanakan kerja air awam segera demi kepentingan rakyat dalam jangka masa panjang.

Media sebelum ini melaporkan kira-kira 590,000 pengguna air di negeri ini termasuk pengguna bukan domestik di semua kawasan perindustrian utama akan mengalami gangguan bekalan air selama 96 jam.

Ia susulan PBAPP terpaksa menghenti tugas LRA Sungai Dua bagi kerja-kerja penggantian dua unit injap kawalan 1,200 milimeter (mm) yang mengalami kebocoran.